

左恪靖侯奏稿續編

恪靖奏稿續編卷二十八目錄

湘皖兩軍連獲勝仗摺

雷正綰等退紮請 懲處片

羅陳定邊安定失陷情形摺

截剿南嵐逆回獲勝首逆伏誅摺

覆陳湘皖兩軍未能歸併片

安插制兵籌供客軍糧餉片

湘院兩軍連獲勝仗摺

奏爲湘皖兩軍連獲勝仗現在布置情形恭摺馳報仰
祈

聖鑒事竊金積堡賊勢屢經官軍痛剿實已衰蹙頃據
劉錦棠黃萬友稟馬化澂知前廣東陸路提督劉松山
陣亡喉金積堡逆眾圍犯官軍訊據賊謀供稱賊之詭
謀在犯吳忠堡營壘搶永甯洞水口阻葉昇堡運道正
月十七日五鼓劉錦棠派赴河西護糧隊伍遇伏賊於
葉昇河邊斬悍隊數名劉錦棠黃萬友會商吳忠堡至

下橋地勢遼濶春融冰泮下橋永甯洞水口尤形勢所
必爭應移兵屯紮以昭穩固峽口旣爲賊踞賊得分洩
渠流以灌營壘戒備不可不嚴二十三日平羅接糧隊
伍回營二十六日黎明整隊出擊適賊三四千出金積
堡排列東南提督王承贊喻執益曹義勝進左路提督
李雲貴潘運璋副將趙彩照進右路提督陶定昇易政
中何作霖進中路軍功董福祥爲後路策應部署旣定
適西路礮聲大震劉錦棠黃萬友料峽口之賊已與官
軍接仗也催隊急進東南步賊憑廢堡穩抗不動馬賊

分抄兩旁應戰兩時之久官軍先將馬賊擊敗俟力壓步賊之前賊勢不支向正南敗走官軍乘勝躡殺陣斬悍賊數百名生擒三十餘名奪獲馬匹器械甚夥并兵陣亡十七名受傷六十三名此正月二十六日劉錦棠黃萬友在金積堡東南接仗獲勝之情形也湘皖兩軍軍糧自東道梗阻均就河西採運賊騎每乘間抄掠是夜提督金運昌會商劉錦棠黃萬友各分兵夾河築壘以資防護二十七日黎明兩軍隊伍甫至河邊見遊騎數十自正東瞭望返奔而去少頃塵氛大起胡家堡甘

同王洪等寨馬步三千餘眾蜂至金運昌督所部攻其左劉錦棠督所部攻其右相持未久左路馬賊先敗劉錦棠飭提督譚拔萃周國勝從右路抄出步賊之後步賊復潰官軍兩路追殺五六里日暮收隊劉錦棠仍派提督李占椿率所部護築新壘二十八日壘成辰刻胡家堡之賊千六七百名距營五六里而陣李占椿守壘金運昌迎敵正酣戰間劉錦棠率隊馳至併力壓擊追殺四五里而還兩戰共斃賊六百餘名劉錦棠所部生擒二十餘名奪馬械甚夥弁勇陣亡二名受傷二十七

名此正月二十七八兩日劉錦棠金運昌接仗獲勝之情形也二月初二日黎明金積堡漢伯堡逆眾四五千迤南而東齊集板橋圍撲董福祥營李雲貴率隊助董福祥憑壘禦賊提督蕭章開督所部直貫賊陣銳不可當李雲貴董福祥自營內衝出來擊賊駭而奔官軍分途掩殺斃悍賊二百餘名拾拾鎗十七悍梯牌十餘件生擒十餘名此二月初二日蕭章開董福祥李雲貴會剿板橋撲營逆賊獲勝之情形也嗣是冰凍漸解野潦縱橫劉錦棠黃萬友相度地勢或開溝疏濬或築堤防

堵金運昌駐軍金積西北界秦渠之東切近馬家灘早
元堡賊寨初六日黎明早元堡逆回數百憑秦渠築堤
設卡金運昌會蕭章開何作霖易致中分三路剿之遂
時金積各堡角聲四起援賊大至各營收過渠南嚴陣
以待劉錦棠加派馬步助戰賊勢驕甚金運昌由右路
沿堤衝擊劉錦棠分從左路迎剿自督易致中周國勝
策應各路將士奮威衝殺賊敗過渠北蕭章開越渠擊
之金積各堡繼出悍賊來援劉錦棠督何作霖併力猛
撲該逆紛向老巢敗遁是役共計斃賊四五百名劉錦

巢所部奪獲戰馬器械尤多弁勇陣亡十七名受傷六十二名此二月初六日劉錦棠金運昌會剿金積各寨逆回獲勝之情形也初八日陝甘各回傾巢而出騎賊數千先近板橋步賊一路出正北築壩決堤一路出正西撲金運昌營壘劉錦棠麾軍援剿瞭見渠堤已被賊決水勢南趨渠北之賊甚厚金運昌迎剿之兵已阻於水正西賊眾林立冒死撲營劉錦棠分中左右三路烏水猛進軍士遇賊卽斫金運昌馬步應之黃萬友率陶定昇易致中周國勝趙渠橫出賊前怒馬衝擊截賊爲

數段正西馬步賊鼠竄歸巢正北之賊猶拚拒壩口黃萬友調開山劈山礮輪轟之賊始全數逸去各軍收隊漏已二下矣是役兩軍斃賊約千餘名劉錦棠所部生擒七十七名奪獲戰馬百餘匹抬鎗三十餘桿梯牌多件并丁陣亡三十一名受傷一百四十八名此二月初八日劉錦棠黃萬友金運昌會剿陝甘回逆獲勝之情形也是夜金運昌以正北蔡家橋一壘距賊卡里許會商劉錦棠撥營聯絡以資控制初九日五鼓劉錦棠派步隊十營出正北修壘料賊必悉眾來爭約金運昌各

伏兵渠南廢堡偃旗息鼓以黃萬友右路之兵列陣渠北劉錦棠督中路修壘相機應之天甫明金積各堡逆眾絡繹出巢擁至蔡家橋齊隊劉錦棠按兵不動戒軍士趕緊築壘一面準備擊賊辰巳之交賊有沿隄放鎗者有越渠撲壘者伏兵起賊駭而奔渠內悍賊二百餘無一脫者中右兩路乘勝壓剿賊敗歸金積早元各堡而東南胡家堡王洪等賊復決開山水溝以淹吳忠堡赴河西運道劉錦棠令各營環壘修堰引注小渠合流入黃初十日午後各營正分段開掘渠溝忽胡家堡及

各寨步賊千餘騎賊一二百隔水搦戰官軍用開花礮
測準擊之一轟而退二鼓築溝通暢金積堡逆眾復搬
磚石築卡於北環以長堤意在引馬連渠水困官軍十
一日黎明劉錦棠金運昌令各營携鋤鍤分道並進寨
賊亦紛集堤邊抗拒官軍躍馬衝入賊陣當者辟易羣
賊併向金積東門敗走官軍躡至堡外次第收隊平其
卡而還連日之戰兩軍共斃賊七百數十名劉錦棠所
部生擒五十七名奪戰馬十二匹拾器械無算弁勇陣
亡十一名受傷七十一名此二月初九初十十一等日

劉錦棠金運昌會剿逆回蕩平賊卡獲勝之情形也臣
維劉松山亡後馬化澂竊幸官軍或難久與相持一面
圖陷官軍一面上稟乞撫據稱時屆春融未及耕墾請
委員辦理撫局稟中微及陝回本意就撫因劉提督操
之過急遂致中變現仍傾心求撫等情臣比批飭從來
中國與外國爭戰原有燒荒及擾耕獲之事若甯靈本
是中國土地人民漢回均是

朝廷赤子與用兵外國不同無禁其耕墾之理前劉提
督辦理剿撫並無舛錯卽再委員前來亦別無辦法察

其情形亦似窘迫實甚陝回人馬餓斃已多糴買無出
馬化糧存糧亦難久支柴草尤乏所恃以負固稽誅者
惟秦漢兩渠之委在下橋永甯洞其導源則在峽口永
甯洞已經官軍扼守司其官洩賊雖決渠不足困我而
峽口被賊占踞官軍不奪其所恃亦終無以制賊現擬
由靖遠造船配礮乘河流盛漲駛攻峽口如果奪此要
津庶足制其死命惟湘皖兩軍糧食告匱雖百計圖維
終慮難於持久微臣所日夜焦思不遑寢饋者也此次
連獲勝仗除金運昌一軍詳細情形俟接來牘另片陳

報外所有劉錦棠一軍各戰陣亡之記名提督周和美
補用參將趙吉祥參將銜游擊周大雨游擊銜都司馮
餘雲都司龔龍舜都司銜守備鄧晚雲黎亮高守備李
世梧章貴義馬呈祥守備銜千總董福生把總曹松茂
許忠美吳永清劉得勝等均係衝鋒陷陣血戰捐軀合
無仰懇

天恩飭部各照所保官階議給

卹以慰忠魂所有北路官軍獲勝現籌布置情形謹
會同幫辦陝甘軍務署陝西巡撫臣劉典恭摺馳報伏

乞

皇太后

皇上聖鑒訓示施行謹

奏
同治九年三月初七日

雷正綰等退紫請

懲處片

再陝西提督雷正綰題奏提督周蘭亭正月十三日峽口之挫傷亡弁丁二百餘名經臣於二月二十七日附片陳明一面調道員黃鼎星連馳援務奪回峽口要地以重形勢旋據雷正綰報稱十五日至二十日賊勢日

蓋披猖逆曰守營出隊營哨各官多有傷亡而黃鼎赴
援兼須護解大批糧運軍火二十三日始抵四百戶二
十五日率親兵兩營隊伍剛抵甯安堡而所部三營尙
隔一日之程比於甯安堡昭雷正綰前此派赴中衛護
糧之營官提督周定邦總兵陳義據稱賊勢圍逼甚急
請速救援遲恐無及是日賊用大礮對雷正綰中營轟
擊四哨哨官均被礮轟斃雷正綰堅守營壘督將士悉
力抵禦待援黃鼎以事機緊逼不候續到三營取齊商
請周蘭亭帶所部列隊峽口之後張福齊帶所部列隊

牛頭山副將楊正華列隊牛頭山口自率兩營親兵步隊桂錫楨副青旗馬隊及雷正綰所部馬隊由牛頭山前進並飭閭定邦陳義興糧隨後繼進以餉飢軍二十六日辰刻師進牛頭山見賊馬步數千正攻雷正綰營壘甚急黃鼎自牛頭山率隊壁下賊見官軍猛進卽解圍迎戰黃鼎麾所部數百人左右盪決賊紛紛敗走正追殺間忽黃渠內馬步伏賊齊出峽口賊亦由後抄截官軍歸路黃鼎率總兵韋占雄參將朱蘭亭等皆下馬力戰短兵相接兩時之久斃悍賊甚多韋占雄忽中礮

陣亡金積堡逆賊是日經劉錦棠擊敗行亦蜂擁前之
截阻牛頭山歸路黃鼎見賊勢頗重日影漸西乃與總
兵劉治均游擊黃得勝等結隊徐退衝出山口副將吳
啟雲楊正華各率所部擊退山上包抄之賊雷正綰乘
賊與黃鼎廝戰率所部突圍出而峽口遂仍爲賊踞矣
臣維秦漢兩渠皆由大河分注由永甯洞會流入河是
永甯洞者渠之尾也兩渠皆導源於峽口爲渠之首金
積堡所恃以爲險者秦漢兩渠永甯洞雖爲湘軍所扼
下流宜洩得以自由不致爲賊所困而峽口一被賊踞

無以制賊而速戎機正月初三日劉松山晤商雷正綰
思蘭亭張福齊徐文秀卽以峽口宜築壘扼駐勿令賊
佔爲言雷正綰允其分營扼守遲至十二日始築峽口
之壘壘成不卽派隊填紮致賊從河西履冰突至據所
築新壘成此厲階咎本難辭惟忍飢苦戰十二晝夜將
士有死傷而無逃散情事似有可原應請

旨將陝西提督雷正綰革職留任以觀後效周蘭亭張
福齊兩軍於正月二十夜糧盡退回鳴沙州比黃鼎二
十三日護糧至四百戶事已無及該兩軍由金積堡退

軍時實因軍糧告罄領護軍糧後卽同黃鼎進援峽口
與尋常饋事者有間惟兩軍先退致雷正綰孤軍受敵
退軍時又未告知雷正綰究屬咎有應得應請

旨將題奏提督博奇巴圖魯周蘭亭提督銜記名總兵
達桑阿巴圖魯張福齊均撤銷勇號拔去花翎一併革
職暫留軍營差遣以明軍律黃鼎所部記名總兵辜占
雄膽技優長每戰奮勇爭先當者辟易此次深陷賊陣
遍體傷痕力盡捐軀實堪憫惜之至應請

旨飭部照總兵陣亡例從優議卹以慰忠魂其雷正綰

周蘭亭黃鼎所部陣亡將士應俟查明請

卹現在雷正綰駐紮何家堡周蘭亭駐紮四百戶均進
兵要路正飭歸併營伍切實整理以待再舉張福齊一
軍已調回陝西臣因諸軍此次之退峽口之挫於全局
大有關係情罪不可不明非訪察確寔未敢輕率入
告是以陳奏稍遲合併聲明伏乞

聖鑒訓示施行謹

奏

同治九年三月初七日

覆陳定邊安定失陷情形摺

奏爲遵

旨覆陳仰祈

聖鑒事竊臣於二月初一日平涼營次欽奉正月二十四日

寄諭劉典奏回逆分竄陝境情形暨擊退竄涇賊股收復定邊各摺片回匪竄擾陝境攻陷安定襲陷定邊賊蹤飄忽肆行奔突左宗棠回援之軍轉落賊後該督撫等同辦一事何以彼此不相聯絡致誤事機現在瓦竄

舖踞匪勢甚兇悍慶陽之賊又復竄至三水繞竄永樂店窺伺省城且尙有陳瞎子一股亦思竄陝定邊之賊攻撲省條梁鎮靖堡等處並有另股賊匪滋擾希圖下竄賊蹤紛至沓來幾至不可收拾安定定邊雖據奏稱收復殊不足恃著卽將實在情形查明具奏左宗棠入甘後自應酌留重兵力顧後路劉松山金運昌所部本係分紮花定何以不遵札飭竟行相繼前進雷正綰周蘭亭張福齊簡敬臨等四軍左宗棠祇令其剿辦半角城等處踞逆何以道員會傳理竟令各軍進發以致回

逆乘虛竄入各軍進止自由無所約束該大臣當嚴申
號令立將貽誤各員查明參奏以示懲儆陝省防兵過
單左宗棠務當抽撥勁旅回顧陝疆迅將紛竄各匪盡
數殲除毋稍鬆勁等因欽此跪誦之下惶悚莫名竊維
紛竄陝境之賊原祇兩路一路由金積堡東南翻山竄
出環慶一路賊目爲海萬新藍明太馬正剛等人馬約
二千餘經道員魏光燾提督劉端冕疊次截剿海藍等
逆在甘境掃滅已盡馬正剛一股由三水入陝擾及蒲
富同朝一帶圖由澄白郿甘歸巢經劉端冕扼剿數次

擒斬殆盡馬正剛雖未就縛而所掠同朝騾馬衣物糧食則均奪回矣一乘河冰合凍出邊驍繞陷定邊安定紛竄延榆綏近乃由宜川竄韓鄒頭起爲逆目馬呼來劉端冕兩敗之擒斬約數百馬呼來敗竄楊家店轉角子等處復爲知府陳鴻藻總兵殷華廷等所敗又爲魏光燾及鎮原防軍總兵江得意楊大章所敗敗匪不過二百餘此股歸巢無幾頃接到端冕報陝回馬阿渾等一股約二千餘由金積堡竄過靖邊安定延安一帶圖由韓鄒竄鳳翔覓歸路宜洛一帶游匪土匪及譁潰之

皖軍附之勢眾且悍劉端冕兩敗之然賊勢仍張署陝
西撫臣劉典商調陝軍總兵張福齊率所部由四百戶
地方回陝助剿臣雖飛檄赴調誠慮緩不及急適員外
郎銜中書科中書吳士邁奉周開錫檄來平涼臣卽飭
其率隨行一營赴乾州立調所部駐隴州三營來乾會
隊彙據各路稟報賊之零騎已蔓及咸陽醴泉武功岐
山乾州一帶然劉端冕及陝軍各營已經署撫臣調由
蒲城富平躡追而西李輝武所部由寶雞迎剿而東吳
士邁由涇平乾州壓剿而南臣又飭吳士邁所部駐鳳

縣兩營循渭水南岸出郿縣蓋屋北赴乾州會隊并飭
魏光燾截其由慶陽鎮原歸金積堡老巢之路現在延
榆綏一帶及韓成郃陽同州續無警報似竄陝之賊實
已全數西趨雖各處游匪潰卒絡繹奔走迸注西路人
馬之數亦不過三千有奇是由金積堡乘冰繞竄定邊
一路入陝賊數約略可計疊經剿敗兇焰漸減非必不
可收拾者也安定定邊收復以後無重兵鎮壓本爲可
慮然大河冰泮勢難飛渡金積堡北阻大河正東東北
湘軍已夾河設守頃得金運昌稟報因軍食無出擬拔

步隊四營回駐花馬池定邊就取鎮靖堡之糧似定邊
安定尙可無意外之慮至劉松山進兵時臣原飭每人
持三月糧復於花定節節留營轉運以資接濟嗣金運
昌由綏德續進臣飭其到花馬池後停軍勿前於花定
一帶留營護運聽劉松山商調劉松山見皖軍銜接而
來始調護運各營赴靈州吳忠堡各處以厚兵力其時
吳忠金積連獲奇捷金運昌急於助剿而所部各營之
散布定邊花馬池者又方以戰鬥爲樂運糧爲苦日求
迅赴前敵金運昌亦以郭寶昌已於綏德買駱駝三百

頭轉運吳堡存糧隨身尙有兩營步隊馬隊百騎堪資
護運遂并定邊各營撤赴靈州由吳忠堡進紫金積堡
郭寶昌帶所部赴晉並不知會金運昌撥隊回紮此定
邊所以被賊襲陷也劉興於定邊之失專歸其咎於金
運昌未爲確論至雷正綰周蘭亭兩軍之急進金積堡
原因固原黑城李旺各城堡克復後金積堡陝回畏剿
悉數西趨維時臣有甯靈並無陝回之奏迫黃鼎由黑
城子鹽菜廳橫出擊之大捷於打拉池城截賊爲兩禹
得彥崔三馬生彥白彥虎等遂由郭城驛巉口竄狄道

河州馬正和陳林余彥祿等由長流水甯安堡一帶復
回竄金積堡臣檄黃鼎一軍及提督張會元楊世俊帶
所部馬隊由靖邊南下以剿禹崔各逆而檄雷正綰周
蘭亭所部馬步全軍截剿馬陳回竄各逆其簡敬臨張
福齊兩軍分駐半角城韋州堡以撫新降回眾護北路
糧運而斷外賊援應之路詎料簡敬臨張福齊於未接
臣檄之前已拔隊由預望城韋州堡越石溝驛而逼金
積堡臣接其啟行緘牘飛檄止之事已無及又念簡敬
臨張福齊卽遵檄迨返亦恐墜士氣而啟戎心不得已

乃就現有兵力節節挪移向前以護運道鎮壓東西兩山新撫回民爲救敗之著此韋州預望一路空虛無以扼賊奔衝陝回所以得由環慶竄陝也劉典此次所陳乘勝銳進後路空虛者臣固早已慮及且緘告之矣至魏光燾之軍由慶陽環縣追捕土匪明七十子等向鎮原固原交界白家塙一帶而來非因臣調其護運且賊未竄慶陽之先魏光燾已回慶陽截剿竄出頭起各賊其竄慶陽屬之賊馬正剛一股亦經魏光燾派魏紀鑒率所部前營隨同劉端冕剿之特未能遏其竄陝耳至

四川道員曾傳理本殉節道員黃淳熙辦營務之員黃
淳熙殉節後駱秉章派曾傳理接統其軍卒平蜀寇上
年臣自直東剿捻西旋聞劉典札調曾傳理赴陝適臣
營務乏員商調隨營辦理營務迨諸軍前進時臣令其
赴半角城督催各處轉運安輯良回亦曾見諸奏牘方
李旺堡打拉池大捷時賊勢實極衰蹙馬化澂方謀移
巢西甯避官軍之銳諸統將急思乘時自奮慷慨赴功
各有風利不泊之意曾傳理於諸將領有無商榷前進
之語雖不可知至謂諸軍乘勝銳進由曾傳理督令所

致則亦非確論臣自咸豐十年忝任軍寄軍中事無巨細均出親裁營務人員非別將一軍獨當一路遇有軍事皆須諮稟而行劉典相從最久知之已深臣豈獨於曾傅理任其顛恣且曾傅理入營未久諸將領亦未必降心相從由其指使頃張福齊自四百戶調歸西安臣何輕進是否由曾傅理催促致然張福齊亦祇引爲已咎無異詞臣不敢諉過曾傅理爲分謗之計劉典與臣爲布衣交軍中共患難者十年矣臣於同治五年九月請

簡派劉典幫辦軍務摺內曾稱其爲人剛明耐苦廉幹而有志節可保其斷不負

國斷不厲民然性稍褊急有所見必達其是亦經據實陳明劉典自蒙

恩簡署陝西巡撫以來其勤民憂

國之忱人所共見減里差革陋規劾貪劣深洽輿情陝民間其將去呈請暫署西安將軍陝甘學政籲請

奏留署任其明徵也前以思親甚切引疾乞休拜摺後臣始有所聞欲貽書勸之而已無及嗣因陝回竄陝各

路風謠四播羣言賊勢甚張倍深憂憤推求局勢之壞
由於諸將輕進遂本所聞見上達

宸聰臣前疏稱其有所見必直達其是者卽此類也茲
因

聖明垂詢謹據實覆陳伏乞

皇太后

皇上聖鑒訓示謹

奏
同治九年三月初七日

截剿南甯逆回疊勝首逆伏誅摺

奏爲官軍截剿南竄回疊次獲勝首逆伏誅恭摺馳
陳仰祈

聖鑒事竊陝甘各回黨聚金積堡近因乏食四出竄擾
臣前因固原鹽茶廳所屬東西兩山南界平涼北界靈
州周數百里回民居其大半中間良匪雜糅亟宜分別
剿撫以規久遠遂擬設旌善營令已革壽春鎮總兵蘇
如松督之擇良回軍功馬柏森穆進善李百寬等爲營
官各帶土著馬勇分起駐紮給以薪糧馬乾隨官軍剿
捕土匪客匪馬柏森本萌城回目上年官兵由平涼掃

蕩而北固原州黑城子李旺堡預望城等處回目經官
軍剿敗各挈其黨遁歸金積堡蓋舊奉馬化澂爲宗主
者也預望城地勢北接韋州堡賊由金積南竄必經韋
州堡以達預望一過預望則道路紛歧防剿均費兵力
馬柏森者本萌城之良回於時瞰預望回目馬萬春投
入金積堡遂自萌城徙居之斬通逆小回目而輸誠於
官軍截殺逆騎八十餘馬化澂穆生花恨其倍已又以
預望城爲逆回南竄要路必欲陷之嗾馬正和率陝回
馬萬春楊達姓率甘回併圖預望城二月十三日馬柏

森飛稟告急記名提督周紹濂及蘇如松由半角城率馬步隊急起援之十五日抵李旺堡十六日黎明由李旺前進甫三十里至馱驢腰線地方遇賊三四百騎周紹濂卽督隊分路猛撲斃賊五十餘奪獲騾馬四十餘匹賊奪路狂奔蘇如松率馬隊先抵預望城賊聞官軍大至翻山竄走十七日周紹濂抵預望城則賊竄已遠忽同民走報是夜二鼓有賊千餘將阿布條回堡攻陷殺傷良回李萬梗等現猶踞堡搬運糧物周紹濂急率所部擊之十八日馳抵楊家灣見賊踞對山齊施鎗礮

周紹濂督隊下山，鳧水而前。飭副將周玉林由中路參將毛正明由左都司周曙良由右三路併進。蘇如松率馬柏森及李百寬等旌善馬隊亦到，分兩路抄擊官軍。衝上山梁，賊亦由山梁下撲鎗礮對轟。官軍自下仰攻，鎗無虛發，連斃執旗悍賊三名，紅衣騎馬賊一名。賊勢稍卻，官軍一齊搶上山梁，鎗矛並進，斃賊無數。賊紛由山旁亂竄，適旌善馬隊飛馳而至，截斬悍賊數十，奪獲賊馬十餘。賊向阿布條狂奔，官軍躡追及之，堡中賊紛出迎拒。官軍悉銳衝殺，斃賊八九十名，生擒二名。賊棄

堡下溝向老虎灣狂竄馬牛糧食拋棄滿地官軍進至
老虎灣始收隊阿布條堡將所獲糧畜給還難民訊生
擒賊目馬生香馬柏壽等知馬正和等圖破預望阿布
條等處以擾李旺黑城子官軍運道因官軍速到預望
城適賊裏糧已盡遂先陷阿布條擬飽掠後仍回攻預
望也周紹濂令馬栢森馳回預望城籌守禦與蘇如松
各率所部追賊十九日由欠溝門一帶搜剿而來沿途
頗有擒斬賊由王家園莊過河南竄李旺堡是日黎明
攻圍李旺堡官營副將李光賓飭存營隊伍兀立垛口

靜以待之賊欺官軍單薄併力猛撲數次李光賓俟其
逼近測準轟擊鎗無虛發賊每猛撲一次必傷斃數人
乃解圍潰竄李光賓開壁縱擊連斃悍賊二十餘名斃
紅衣騎馬賊目二名訊生擒馬八兒馬元娃供稱賊目
一白姓一帥姓皆馬正和所帶東弭悍黨也是夜三鼓
賊分股竄至黑城子南三十里攻破何家溝良回何家
位寨二十日黎明李良穆率所部馳擊甫近何家溝接
總兵張大雄都司周曙良飛報賊之大股經李旺擊敗
併竄黑城李良穆急率隊回剿行十餘里見賊已越黑

城十餘里而來似圍與何家溝賊合隊李良穆帶所部
出山橫截而出奮威衝殺賊駭懼失措紛紛潰走官軍
乘勢壓擊斃賊甚多其何家溝一股自後衝出敗賊復
回旗抗拒李良穆率部搶入土堡一紅衣賊衝近堡門
揮刃斬之又有紅衣騎賊頗悍賊繼至經排礮轟斃賊
始大潰官軍乘勢掩殺收隊回黑城子一面飛馬邀總
兵張大雄都司周曙良前來會剿是夜三更賊折回北
竄一股仍竄回東山二十一日子刻張大雄周曙良自
李旺堡馳至中途遇賊賊見官軍至紛紛潰竄擒斬數

十名昏夜未便窮追天明李良穆帶隊繼至則賊蹤已
遠搜獲落後賊李來娃子及三庚等僉供馬正和於
二十日接仗時猝中礮子自鼻梁穿入腦後透出當經
賊夥用綢旗裹抬逾時氣絕其弟偽元帥馬魁同時轟
斃良回柯大有等所報亦同提督徐占彪在韋州花子
台一帶截剿馬正和敗回一股生擒逆賊馬世英等均
供馬正和頭受鎗傷氣絕臣昨提訊李來娃子供詞尤
爲確鑿是逆首馬正和伏誅已無疑義此周紹濂所部
五營急援預望城保固要地截剿陝甘南竄逆回疊獲

勝仗首逆馬正和伏誅實在情形也當賊之圖預望也
臣檄黃鼎所部升用提督徐占彪率步隊三營馬隊一
營馳往援剿黃鼎更以步隊兩營益之二月十六日由
固原拔行十九日抵預望城是日午刻馬伯森報有賊
目李花喜馬有全蘇文舉李德隆率賊千餘由金積堡
竄出韋州過下馬關盤踞距預望城四十里之吳家腦
徐占彪等卽於是夜蓐食潛師夜起黎明行近吳家腦
見該處峯高路狹非用眾之地總兵陳玉春趙興隆參
將林定遠等飭馬伯森前行引路由王家山黑溝繞道

抵虎家山麻兒灣設伏以待徐占彪率兩營逕捕吳家
腦賊甫驚覺徐占彪麾軍縱擊斃賊百餘名擒賊六十
餘名賊紛向虎家山敗遁徐占彪率陳春萬猛躡之甫
抵虎家山陳玉春自山後截出林定遠由左趙興隆由
右兩面抄來將全股賊眾裹在中央各營縱橫盪決馬
柏森亦下馬步戰立將賊目蘇文舉擊斃生擒賊目李
花喜馬有全并擒賊目鎖保鳳蘇成功馬海望李保成
馬有保李有俊蘇成明馬得印等及悍賊七十餘名
斃餘賊二百餘名墜巖死者無數奪騾馬五百餘匹是

夜派隊搜山復獲賊四十餘名斬之二十一日收隊還
預望訊據賊目李花喜馬有全等供奉馬化隆穆生花
命率領五營於十六日由金積堡竄出走韋州下馬關
至預望圍攻堡寨併探路徑如無大兵阻截卽率股分
途赴陝擄糧現飭解營審訊此股賊目祇李德隆一犯
漏網餘賊逸出者亦無幾矣二十二日馬柏森報稱馬
正和一股經官軍痛剿敗歸金積堡已竄近下馬關二
十三日徐占彪督步隊五營追之已刻抵下馬關見地
勢平行卽結方陣前進行十餘里遇賊各營奮威衝殺

賊不能當，紛向韋州敗遁。追近韋州六七里，殺悍賊五十餘名，奪獲騾馬七八十頭。是夜，調賊廣聚花子台徐占彪以三營扼韋州堡，自率兩營及馬柏森、旌善馬隊潛起襲之。賊倉卒不知所爲，駭懼紛竄。官軍乘勢掩殺，斃賊無數，生擒悍賊十二名，奪獲騾馬六十餘頭。此徐占彪截剿金積堡南竄甘回殲除殆盡，及截剿馬正和敗殘陝回獲勝實在情形也。其定邊環慶兩路竄擾陝西各股，近由慶陽鎮原預望一帶北竄歸巢，均經各軍各營隨時隨地次第截剿，斬獲頗多。容俟確切察明再

行馳報所有此次截剿金積堡南竄陝甘各回殲除首逆最爲出力之記名提督法什尙阿巴圖魯周紹濂應請

旨交部從優議敘督帶旌善馬隊已革安徽壽春鎮總兵捷勇巴圖魯蘇如松請

旨開復原官留於甘肅補用升用提督哈西巴巴圖魯徐占彪擒斬賊目多名力堡預望城要地厥功甚偉應請以提督記名遇有提督總兵缺出儘先開列請

旨簡放記名總兵李良穆陝西肅清案內擬請勇號續

於迎剿崔禹等逆竄擾半角城時護糧赴營中途遇賊
堵擊一晝夜克獲大捷身受重傷茲復以寡擊眾陣斃
首逆馬正和實屬異常出力應請

旨賞給清字勇號並

賞加提督銜其餘出力將弁勇丁可否由臣核明擇尤
保獎出自

天恩此次出力同日軍功馬柏森穆進善李百寬王益
萬等確偵賊蹤導引官軍克獲全勝助剿殺賊勞績卓
著本應隨摺請

獎因從前疊經領兵大員賞給功牌職銜均未敘
奏容俟查明核奏請

旨破格優獎以示激勸謹據實馳陳伏乞

皇太后

皇上聖鑒訓示施行謹

奏同治九年三月初七日

同治九年三月十五日內閣奉

上諭左宗棠奏官軍截剿竄回迭獲勝仗請將出力各
員懇恩獎勵一摺陝甘逆回由金積堡四出竄擾逆首

馬正和率眾圍撲預望城攻破阿布條何家溝等處冀
搜李旺黑城子官軍運道經提督周紹濂等督率各軍
馳往截剿先後擒斬逆匪多名餘匪紛紛敗竄據擒賊
供稱馬正和及其弟偽元帥馬魁均經轟斃其竄走下
馬關吳家腦各逆亦經提督徐占彪等奮力剿擊殲除
殆盡剿辦尙爲得手仍著左宗棠飭令各軍乘勢進剿
迅殄逆氛所有此次尤爲出力之提督周紹濂著交部
從優議敘已革總兵蘇如松著開復原官留於甘肅補
用提督徐占彪著以提督記名遇有提督總兵缺出儘

先開列請旨簡放總兵李良穆著賞加提督銜賞給西林巴圖魯名號其餘出力員弁兵勇著准其擇尤保獎毋許冒濫餘著照所議辦理該部知道欽此

軍機大臣 字寄同治九年三月十五日奉

上諭左宗棠奏湘皖兩軍叠勝現籌布置情形陣亡員弁請卹並賊踞峽口請將失事各員懲處及查明定邊安定前次失陷情形各摺片覽奏均悉金積堡踞逆經劉錦棠等軍擊收後乘間抄掠河西運道復經金運昌會同湘軍夾擊殺賊甚多二月初二日以後劉錦棠等

在馬家灘板橋等處迫剿馬步各賊疊獲勝仗該逆欲引馬連渠水以困官軍劉錦棠分道並進賊向金積堡東門敗走各軍平卡而還現在劉錦棠等以吳忠堡至下橋一帶爲形勢所必爭移兵屯紮以爲扼要地步著左宗棠卽飭劉錦棠等將金積外援力圖遏截以期攻拔堅巢劉錦棠所部之陣亡提督周和美參將趙吉祥參將銜游擊周大雨游擊銜都司馮餘雲都司龔龍舜都司銜守備鄧晚雲黎亮高守備李世梧章貴義馬呈祥守備銜千總董福生把總曹松茂許忠美吳永清劉

勝均著交部照所保官階議卹峽口地方緊要雷正綰
築壘旣遲又不派隊填紮以致爲賊所踞實屬咎無可
辭雷正綰著革職留任周蘭亭張福齊率軍先退亦難
辭咎均著撤銷勇號拔去花領並革職暫留軍營差遣
黃鼎所部之陣亡總兵章占雄著交部照總兵陣亡例
從優議卹該處爲秦漢兩渠上游必須趕緊奪回方能
制賊雷正綰現紮何家堡周蘭亭現紮四百戶尙屬進
兵要路至宗棠務飭該提督等整理營伍設法進攻毋
任該逆久踞如該兩軍再有遷延貽誤並著嚴參懲辦

至前次定邊安定爲賊襲踞既據查明金運昌暨簡敬
臨張福齊等軍前進各節尙屬有因卽著暫行毋庸置
議倘再有貽誤重情卽著從嚴參辦嗣後各軍進止務
當嚴飭帶隊官恪遵將令毋得貪功銳進致誤事機會
傳理在營是否得力並著隨時查看毋稍遷就該大臣
現擬由靖遠造船配砲乘河流盛漲駛攻峽口所籌甚
是著卽分檄各路將士次第規取制賊死命陝甘毗連
處所時有回蹤游勇亦復滋擾劉典仍當隨時督率
旨嚴飭在防各營會同甘軍相機堵擊大剿渠涉大意

左宗棠奏截擊預望等處鼠回獲勝請將出力員弁獎勵等語本日已明降諭旨宜示將提督周紹濂等照所請獎敘矣將此由六百里各諭令知之欽此

覆陳湘皖兩軍未能歸併片

再二月十四日據辦理西征糧台翰林院侍講學士袁保恒抄送二月初九日拜發摺稿所陳西路軍情緊急北山賊勢披猖一切接之目前實在情形不甚符合自係未接各路軍營及各州縣稟報所致袁保恒從前因護運起見請募馬步勇丁各三百名臣以爲數無多允

之至此次奏請續調淮皖各軍並未與臣商及而月片所稱老湘卓勝兩軍飢疲之餘多有缺額聞現存不過十之五六請

飭就現存之數核實歸併節省所餘江蘇安徽之餉勻作續調淮皖各軍之用尤不可解臣不能無言竊維軍營勇丁額數歷時稍久缺額必多不獨打仗時有傷亡卽物故逃亡責革三項亦事所時有缺額之餉名爲截曠營官之廉價者或取充營中公用或繳歸糧台或續行補募不再開銷經費其不肖者截曠盡飽私囊各省

軍營餉事大致如此陣亡提督劉松山前年駐軍洛陽
道員劉錦棠回湘募勇上年四月到營因應募者多溢
額千數百名無缺可補除入臣軍提督陳廣發一營外
餘俱留爲餘勇收入各營此由兩江給餉者也其收董
福祥等馬步二千餘人則由臣軍給餉人數浮於額數
殆逾一半以所部降卒積受甯靈回眾擾害願隨同殺
賊報仇者多也上年冬間臣念劉松山每戰必有傷亡
勇額恐有缺少該軍多湘人以湘人補入爲宜預飭已
革山西按察使陳澍來甘時募從前在晉各營之二千

五百人前來待補缺額以其服習西北水土也劉松山亦以董福祥等降眾打仗奮勇漸習營規令提督彭緒炘赴延綏一帶再選募千數百人預擬補董宇三營之缺此皆有案卷可稽者也袁保恒原奏謂飢疲之餘多有缺額並稱現存不過十之五六不知何指又稱就現存之數核實歸併節省所餘江蘇安徽之餉預作續調兵勇之用自係指淮皖各軍而言淮皖各軍臣除調總兵鄧林楓參將馮桂增選募數營外別無所謂此數營者亦非袁保恒臧薦之人不知袁保恒意中欲擬續調

何軍移作何軍之餉昨接皖撫臣錄覆該學士召募咨
文詢其舊部何人臣亦無以覆也至劉松山老湘一軍
餉銀七年十一月奉

旨飭令江蘇每月協濟六萬兩嗣經劉松山牘稱所部
新舊各營每月尙缺額餉一萬五六千兩此外應領帳
棚等項雜款無從籌給請仍由江南照舊供支經臣奏
奉

諭旨飭令馬新貽丁日昌仿照舊案供支其帳棚車輛
與米價馬價及員弁勇丁卹養等項亦著一併源源解

濟而江南仍未遵

旨加解統計該軍欠餉除江南按月起解六萬兩外已積欠二十餘萬兩而帳棚車輛米價馬價卹養等項在江南應支者在甘肅不得停支此數項又將安出且甯靈一帶糧價昂貴倍常計糧一斤合腳價銀一錢有奇每人日食酌給斤半卽需銀一錢五分勇丁口糧每日一錢四分計已不敷糧銀一分有奇勇丁旣無銀可捐自應由官採買供支減價發給以示體恤臣撥給該軍採運糧銀定安處二萬兩發西安佐領喜勝銀二萬五

于兩續撥山西協餉二萬兩發靖遠縣二萬兩現據劉
錦棠稟請撥銀八萬兩解中衛廣武營如包頭靖遠
大靖土門等處續可採運尙須加發銀兩以資接濟縱
江南按月六萬兩如期解到且慮不敷挪供買糧之用
更有何項可以節省勻撥續調各軍果如該學士原奏
各軍勢將次第撤退猶且不能驟斷其餉而臣接劉錦
棠二月十二日以前捷報之稟不但並未撤退且將吳
忠堡及各處營壘勻布分紮兩河東至吳忠西至中衛
廣武營計程延紮八十里是進而非退也果如該學士

所稱多有缺額存者不過十之五六又何能延紮八十里該軍人數既不能以該學士所開者爲定臣何從核寔歸併查其餉以餉該學士任意增調之軍具奏一出設江皖督撫臣並應解之餉藉口遲延湘軍因糧盡而致飢潰不但臣一腔熱血竟付東流卽該學士護運以餉臣軍臣軍飽食無虞於大局亦復何補臣之奏請袁保恒辦理西征糧台也原以催提各省關應協餉需至於餉需及運解一切均責之駐陝軍需局員沈應奎以專責成是袁保恒於西征餉事但有催提之責無支應

運解之費至兵事與餉事相爲表裏如有應撤併應增募事宜自可先時與臣及撫臣等往復籌商衷諸一是在袁保恒可免專輒之嫌在臣等亦得預爲籌策以期周妥乃計不出此徑行招致現據潼商道稟報有豫軍銳營入關聞後起亦將續至是否卽係該學士所調皖豫舊部尙未可知但頃接陝西各郡縣稟陝境已無逆回蹤跡運道疏通而皖豫新軍無可位置臣擬咨該學士如新軍已到飭赴平涼由臣編成營旂妥爲安插或折補各軍缺額以期實濟其已募未到之淮皖各軍無

系系之三
論若干概行截止就地遣撤免蹈兵多餉絀故轍爲異
日之累頃奉

諭旨該兩軍旣多缺額他營亦所不免現在餉項支絀
豈可任其冒濫著左宗棠統飭查明核實歸併以節餉
需欽此臣前據金運昌稟所部開有因軍糧短絀逃入
河西張曜營中者續據陝西軍營稟報此次陝回竄至
北山時有卓勝軍逃潰馬步勇丁夥入是否由金積堡
竄出抑係該軍潰勇向匿北山者均未可知總之該軍
本多豫皖積年捻匪此輩原不易馴而前此入關時卽

已人浮於額應之不去現在安徽撫臣將該軍糧台移設山西汾州臣處更無從稽察容俟檄飭金運昌核實報知至雷正綰一軍自峽口敗退後周蘭亭一軍自由金積堡退回後開缺額甚多臣已委員前往點驗矣謹附片陳明伏乞

聖鑒訓示謹

奏 同治九年三月初七日

軍機大臣 字寄同治九年三月十五日奉

上諭前因袁保恒奏老湘卓勝兩軍多有缺額當經諭

令左宗棠查核歸併茲據左宗棠奏稱老湘營因疊次增募溢額頗多除分撥各營外尚有餘勇待補缺額袁保恒所稱飢疲之餘現存不過十之五六不知何指至該學士原奏以歸併節省之餉作續調兵勇之用欲調何軍未與咨商現據英翰咨錄袁保恒召募原文並據潼商道稟稱有豫軍銳營入關後起亦將續至是否卽係袁保恒所調皖豫舊部尙未可知此時陝境已無回氛新軍無可位置擬卽調赴平涼安插其已募未到各軍卽請截止各等語兵事與餉事相爲表裏袁保恒此

次召募各軍何以不與左宗棠等往復籌商輒行咨調
實屬冒昧所有到陝新軍卽著左宗棠調往平涼編立
成營或分補各營缺額藉資調遣其已募未到之淮皖
各軍並著張之萬英翰一體截留就地撤遣如已行至
豫境卽著李鶴年派員截止咨明該省督撫妥籌遣散
左宗棠又稱袁保恒前奏一出設江皖督撫將應解甘
軍之餉藉口遲延湘軍或因糧盡饑潰則大局可慮等
語甘軍本有撥定之款江皖督撫斷不敢因袁保恒此
奏藉口遷延卽李鴻章入陝等軍亦卽以籌定入黔之

餉和濟師行左宗棠正無庸鯁鯁過慮也至金運昌雷
正紹周蘭亭各軍既有缺額卽著左宗棠認真查核歸
併以節餉需陝省應否添軍募勇之處著李鴻章到陝
後酌量情形奏明辦理袁保恒不得再行輕率從事將
此由六百里諭知左宗棠李鴻章張之萬英翰李鶴年
並傳諭袁保恒知之欽此

安插制兵籌供客軍糧餉片

再甘肅兵事方殷各軍糧餉時虞缺乏亟宜就地籌畫
挹注若全恃各省協餉斷難接濟本省制兵向支用本

省丁糧銀兩承平日久兵制久荒變亂以來已失守地方存兵無幾未失守地方懸缺亦多而支放兵糧仍循舊額本縣額徵不敷必於鄰縣估撥以足其數有用之餉糈皆耗於制兵之虛糜臣擬仿照閩浙裁兵節餉章程汰弱留強擇荒絕之地撥爲兵屯慎選將領督令墾種卽以所獲作爲名糧以其餘照時價估作餉項農隙仍操練技藝庶游手之兵皆可自食其力而甲冑卽寓糴鋤之中其各屬額徵丁糧銀兩擬提充客軍糧餉以歸實際而省採運經費甘省遭賊蹂躪各屬州縣未能

一律開徵惟南路較爲完善鞏秦階所屬地丁每年應徵銀十二萬餘兩額糧共七萬餘石雖不能如額征足若地方官認真整頓涓滴歸公當可日有起色臣現飭鞏秦階道先行查明豐歉議定章程通飭所屬各州縣地方官曉諭各鄉里甲額征糧石一體全完本色不准折收銀兩額征地丁隨收隨報由臣勻撥各營支領如有巧立名色從中舞弊由臣分別參辦其餘各府州縣亦擬次第酌辦庶兵糧皆歸實用於地方軍務兩有裨益所有安插制兵就地籌供各軍糧餉緣由是否有當

謹附片具陳伏乞

聖鑒訓示謹

奏
同治九年三月初七日

軍機大臣 字寄同治九年三月初七日奉

上諭劉典奏官兵追剿竄回疊勝陝甘現無回蹤出力員弁請獎并馬正綱一股殲除殆盡出力員弁分別奏請獎卹及剿擊北山回土各匪獲勝請將員弁議卹各摺片覽奏均悉洞酋馬長鳳等股勾結游勇由北竄入內地官軍追剿情形業經劉典先後馳奏茲據奏稱劉端冕各軍在韓城等處擊賊獲勝賊由臨渭一帶搶渡渭河均經水師擊敗高陵之賊經魏絕盞等率隊敗之張佑廷李輝武諸軍又於醴泉武功各境追賊疊勝該

逆渡涇之後分路潛逃附入游勇亦已悉數衝散其奔竄甘境者僅數百人劉典現飭在陝各營於陝甘毗連處所嚴密設防馬正綱一股亦經劉端冕等追殺殆盡據逃出難民供稱馬正綱已被鎗斃各等語此次回匪紛竄陝疆圖絕陝甘糧道劉典督飭諸軍進剿疊獲勝捷該省已無賊蹤剿辦尙屬得手本日已明降諭旨將出力之提督李輝武等副將吳賢華等分別獎卹矣刻下金積堡賊巢甘軍圍攻正緊其折竄甘境各匪難保不勾煽餘黨復謀東竄牽掣進剿諸軍左宗棠當督飭

在甘將士將金積堡相機攻取并檄飭派出援陝之軍將折回餘匪攔頭截擊務絕根株近日甯靈一帶軍情若何著隨時據實具奏以慰廑系劉典亦當嚴飭各處駐營力加防範不准稍涉疏虞馬正綱是否鎗斃仍著確切查明此起零星匪究係逃往何處并著飭令在防將弁隨時偵探以期搜捕無遺清澗等處踞匪既經總兵田玉廣等殲除殆盡而定邊西境及馬花池一帶復有回蹤弁由安邊竄來逃勇一二百名在蔣家寨一帶盤踞甯條梁附近之呂家寨亦有逃勇一二百名是榆綏

一帶防務尙未可鬆著劉典卽飭成定康等加意防維毋稍鬆勁惟陝省前次肅清之後凡地方騷擾半係土匪游勇勾結回逆此次安邊等處逃勇究由何營散出其從前管帶究係何人若任其紛紛肆擾後患何可勝言著左宗棠劉典分飭各路帶兵官弁設法擒拏弁查明該管營官從嚴參辦一面將各處游勇妥籌安插分別遣散以靖地方劉厚基所部陣亡之副將康華亭千總劉秀逢擬保把總外委胡登科均著交部照例議卹將此由五百里各諭令知之欽此